



**Bilind Mihemed**

## Peşrîmekirina dilan

Şevên herimiyên qermok  
fişara xewnên herifî difetisînin.  
Car di gûya eşqa te de, fenereka kiz  
di çavên xwe de dikire wêneyekê qerimtî û  
hemû bilindahî li jêr sîbereka mirî dibûne gok.  
Car ji dûr babelîskên gîrnijîna te ya xapînok û dapûşî, hestên min  
diarandin  
Car weku firîşteyan, geryana te di naxê min de, behîstek ji  
dargûzên gundê me yê sernixûnkirî ava dikir û tê de dikirme şah.  
Car tu, ji rûkên xwe yên pirteqalî asoyekê rengîn di binara  
hêviyên min de diçînî û min hemûyê dikî barekê xeman û xem  
veder dihên û kovana dilê min dibe tu, tu jî hewrekê xirş, di  
panavên fireh de giyanê min li pey sîbera te gerokeke û li ser  
deryayên ne niyas, ne melevan li pey te dibeze  
Di kolankên bajêrekê bê nasname de bo min bibe pêkekê şerabê û  
min veder bi tinê nehêle.  
Hest di aryana şevên birîndar de serxweş dibin  
Mest di xewneka sotî de li jêr rêjgeha rijyana peyvên te,  
qerqudeyê qawaneka kevnarim  
Stiraneka ji rengê şevê di çavên min de dixwînî û bendeka ji rengê  
befrê di çavên te de ava dikim.  
Serhatiya min  
li ser pêçulka cotyarekê nedar

li ber pêlên payizeka pelwerîn  
bi eşqa te firşik bûyime  
û tu jî babelîsk  
Li gel pêlên kengir pera bilind bilind  
di çiyayên bejna te wer dibûm û  
weku sofiyekê di nawiskên ciwanî û xwedêperêsiyê de benî bûye  
Weku Memoyekê di eşqa Zînê de genî bûyî  
Dûmahîk çîrok dê bi te bibêjim  
Dûmahîk rondik dê bo te birêjim  
Dûmahîk ristik, helbesteka agirî ye  
Bûye tok û tu pê hingavtî  
Dê bo te bihavêjim  
Çenda nazikî!  
Demê sûlava silavên te li ser belgên bihareka har min dinixêve  
Çenda nazikî!  
Demê tivyeka henaseya te digehe xelkê bajêrê min, pêk ve serxweş  
dibin  
Çenda nazikî!  
Demê di semagehên tinêy de, tinê tinê bo têhneka sotî tu umêd bî  
Û ezê parve dê ji kû ve aramiyê wergirim!  
Di bûseya hizirên xwe de  
Li ber derazînka dîdeyên te yên bi guriyê alandîn  
rêvîngekê bê rê me.  
Şev, li ber lêhimşta nalînan dinale  
Heyv, bi tirîfeyên xwe li ser rûkên hinarî yên te dibare  
Li gel hatina biharê, jivanekî bo min û xwe destnîşan bike  
Li gel daralînkên henase bikîn  
Te çi car çîroka evîna xwe behs nekirî ye, direwe te hejêkirin nekiribe,  
direwe dilê te beramber hestên te yên pir soz carekê nerm nebibe.  
Direwe, tu bişêy bê evîn bijî.  
Awêtebûna me ya girj  
Nêrînên te yên evînkuj  
Di neqeba peyvên te yên ji leila nêrgizan didagirtî  
Penayê bo wê helbesta xêve bibe  
Volkanên xem û xeyala di zeviya sîngê me de hilde  
Ez nîgargeha hizirên te me  
Tu hevrîşî azirînên min bibe  
Li gel helçûnên min here û were  
Bes bazirganiyê bi hestên min bike